



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

17.06.2021թ.

**Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ԱՑ-ԼՕ-2021/131**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Լ. Անանիկյանի

Պատվիրատու՝ ՀՀ պետական եկամուտների կոմիտե
Մասնակից՝ «Իմփորթ Էյջնսի» ՍՊԸ

Մասնակցությամբ՝
«Իմփորթ Էյջնսի» ՍՊԸ-ի ներկայացուցիչ՝ Գ. Գրիգորյանի,

Գնման ընթացակարգի ծածկագիրը և առարկան՝
«ՊԵԿ-ԲՄԱՇՁԲ-21/1» ծածկագրով բաց մրցույթ, ակցիզային դրոշմանիշերի և
դրոշմապիտակների տպագրության աշխատանքների ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ
քննող անձ), ուսումնասիրելով Հայաստանի Հանրապետության ֆինանսների
նախարարության կողմից 18.05.2021թ.-ի թիվ 26/26-1/7824-2021 գրությամբ «Իմփորթ
Էյջնսի» ՍՊԸ-ին (այսուհետ նաև՝ Մասնակից) գնումների գործընթացին մասնակցելու
իրավունք չունեցող մասնակիցների ցուցակում ներառելու նպատակով նախաձեռնված
ընթացակարգով ներկայացված հիմքերը,

Պ Ա Ր Զ Ե Ց

1. Գործի նախապատմությունը.

ՀՀ ֆինանսների նախարարությունը, ՀՀ պետական եկամուտների կոմիտեի (այսուհետ նաև՝ Պատվիրատու) 11.05.2021թ. թիվ 1/18-2/28053-2021 գրության հիման վրա, 18.05.2021թ.-ին «Իմփորթ Էյջնսի» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին գործը մակագրվել է 18.05.2021թ.-ին:

18.05.2021թ.-ին կայացված որոշմամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ, տրվել թիվ ԱՑ-ԼՕ-2021/131 համարի ծածկագիրը և նույն օրը հրապարակվել է www.gnumner.am կայքում:

26.05.2021թ.-ին, 03.06.2021թ.-ին, 15.06.2021թ.-ին և 17.06.2021թ.-ին նշանակվել և հրավիրվել են նիստեր:

Գործի քննությունն ավարտվել է 03.06.2021թ.-ին և Բողոքներ քննող անձի որոշման հրապարակման օր է նշանակվել 17.06.2021թ.-ին:

2. ՀՀ պետական եկամուտների կոմիտեի ներկայացրած փաստերը և դիրքորոշումը.

ՀՀ պետական եկամուտների կոմիտեն 11.05.2021թ. թիվ 1/18-2/28053-2021 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Հաշվի առնելով, որ «ANY Biztonsagi Nyomda» Nyrt-ն և «ԻՄՓՈՐԹ ԷՅՋՆՍԻ» ՍՊԸ-ն մասնակցել են ՀՀ պետական եկամուտների կոմիտեի կողմից կազմակերպված ՊԵԿ-ԲՄԱՇՁԲ-21/1 ծածկագրով գնումների էլեկտրոնային (ARMEPS) համակարգի միջոցով բաց մրցույթով ՀՀ պետական եկամուտների կոմիտեի կարիքների համար «ԾԽԱԽՈՏ», «ԱԼ ԿՈՆՈԼԱՅԻՆ ԽՄԻՉԲ» տեսակների ակցիզային դրոշմանիշերի և դրոշմապիտակների տրամադրության աշխատանքների գնման գործընթացին և որի արդյունքում «Գնումների մասին» ՀՀ օրենքի 32-րդ հոդվածի 2-րդ կետի 2-րդ ենթակետի համաձայն խախտել են

գնման գործընթացի շրջանակում ստանձնած պարտավորություն, որը հանգեցրել է գործընթացին տվյալ մասնակիցների հետագա մասնակցության դադարեցմանը՝ կից ներկայացվում է անհրաժեշտ տեղեկատվություն՝ հիշյալ մասնակիցներին գնումների գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՊԵԿ-ԲՄԱՇՁԲ-21/1» ծածկագրով հայտարարված գնման ընթացակարգի շրջանակներում «Իմփորթ Էյջնսի» ՍՊԸ-ի տվյալները՝ համապատասխան հիմքերով:

3. «Իմփորթ Էյջնսի» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 18.05.2021թ.-ին գրությամբ դիմել է «Իմփորթ Էյջնսի» ՍՊԸ-ին՝ հնարավորություն տալով ՀՀ ֆինանսների նախարարության կողմից 18.05.2021թ.-ի թիվ 26/26-1/7824-2021 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստի տեղի, օրվա և ժամի մասին, ներկայացել է հրավիրված նիստերին՝ չներկայացնելով գրավոր և բանավոր դիրքորոշում:

4. ՍՑ-ԼՕ-2021/131 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. ՀՀ պետական եկամուտների կոմիտեի կողմից ակցիզային դրոշմանիշերի և դրոշմապիտակների տպագրության աշխատանքների ձեռքբերման նպատակով 25.01.2021թ.-ին հայտարարվել է «ՊԵԿ-ԲՄԱՇՁԲ-21/1» ծածկագրով բաց մրցույթ (այսուհետ՝ Մրցույթ), որը խմբավորված է 3 (երեք) չափաբաժիններում:

ii. Մրցույթին մասնակցելու նպատակով հայտ են ներկայացրել «Էյ Էմ Փի Ջի գրուպ» ՍՊԸ-ն, «Իմփորթ Էյջնսի» ՍՊԸ-ն և «ANY Security Printing Company» PLC («ANY Biztonsagi Nyomda» Nyrt)-ն:

iii. «Իմփորթ Էյջնսի» ՍՊԸ-ն թիվ 1 հավելվածով՝ բաց մրցույթին մասնակցելու դիմում-հայտարարությամբ (այսուհետ նաև՝ Հայտարարություն) հայտնել է, որ ցանկություն ունի մասնակցել ՀՀ պետական եկամուտների կոմիտեի կողմից ակցիզային դրոշմանիշերի և դրոշմապիտակների տպագրության աշխատանքների ձեռքբերման նպատակով հայտարարված «ՊԵԿ-ԲՄԱՇՁԲ-21/1» ծածկագրով բաց մրցույթին և հրավերի պահանջներին համապատասխան ներկայացնում է հայտ:

iv. Մրցույթի գնահատող հանձնաժողովի (այսուհետ նաև՝ Հանձնաժողով) 09.03.2021թ.-ի կայացրած նիստի թիվ 5 արձանագրության համաձայն՝ քննարկման արդյունքում գնահատող հանձնաժողովը որոշել է հայտերի ուսումնասիրության նպատակով նիստը կասեցնել և այն վերսկսել 2021 թվականի մարտի 15-ին ժամը 10:00-ին, ՀՀ պետական եկամուտների կոմիտեի վարչական շենքում, ք. Երևան, Մ. Խորենացու-3, 7 հասցեում:

v. Հանձնաժողովի 15.03.2021թ.-ի թիվ 6 արձանագրության համաձայն՝

1. «Էյ Էմ Փի Ջի գրուպ» ՍՊԸ-ի կողմից էլեկտրոնային ձևով ներկայացված հայտում առկա են հրավերով սահմանված փաստաթղթերը՝ պիտանելիության չափորոշիչը և ֆինանսական չափորոշիչը, որոնք կազմված են հրավերի պայմաններին համապատասխան:

2. «ANY Biztonsagi Nyomda» Nyrt-ի կողմից էլեկտրոնային ձևով ներկայացված հայտում առկա են հրավերով սահմանված փաստաթղթերը՝ պիտանելիության չափորոշիչը և ֆինանսական չափորոշիչը, սակայն որպես հայտի ապահովում ներկայացրած բանկային երաշխիքի գումարի չափը հավասար չէ մասնակցի գնային առաջարկի հինգ տոկոսին (բանկային երաշխիքում նշված է 180316.3 Եվրո, հայտը ներկայացնելու օրվա դրությամբ Հայաստանի Հանրապետության կենտրոնական բանկի կողմից սահմանված 1 Եվրոյի փոխարժեքը կազմել է 626,82 ՀՀ դրամ):

3. «Իմփորթ Էյջնսի» ՍՊԸ-ի կողմից էլեկտրոնային ձևով ներկայացված հայտում առկա են հրավերով սահմանված փաստաթղթերը՝ պիտանելիության չափորոշիչը և ֆինանսական չափորոշիչը, սակայն բացակայում է հայտի ապահովումը:

vi. Նույն արձանագրության համաձայն՝ գնահատող հանձնաժողովը որոշել է նիստը մեկ աշխատանքային օրով կասեցնել և էլեկտրոնային եղանակով տեղեկացնել «ANY

Biztansagi Nyomda» Nyrտ-ին և «Իմփորթ Էջնսի» ՍՊԸ-ին առաջարկելով մինչև կասեցման ժամկետի ավարտը շտկել անհամապատասխանությունները:

vii. Հանձնաժողովի քարտուղարի կողմից 15.03.2021թ.-ին armeps.am համակարգի միջոցով «ANY Biztansagi Nyomda» Nyrտ-ին և «Իմփորթ Էջնսի» ՍՊԸ-ին ուղարկվել է ծանուցում, որում մասնավորապես նշվել է, որ ծանուցումը ստանալուց մեկ աշխատանքային օրվա ընթացքում պետք է շտկել անհամապատասխանությունը և ծանուցմամբ նշված փաստաթուղթը ուղարկել գնումների համակարգողի էլ. փոստին՝ gurgen_ghazaryan@taxservice.am հասցեով և դրա բնօրինակը ներկայացնել գնահատող հանձնաժողովին: Միաժամանակ հիշեցրել է, որ համաձայն «ՊԵԿ-ԲՄԱՇՁԲ-21/1» ծածկագրով գնման հրավերի 8.10 կետի՝ եթե մասնակիցը շտկում է արձանագրված անհամապատասխանությունը, ապա վերջինիս հայտը գնահատվում է բավարար: Հակառակ դեպքում հայտը գնահատվում է անբավարար և մերժվում է:

viii. «Իմփորթ Էջնսի» ՍՊԸ-ի կողմից 16.03.2021թ.-ին գնումների հետ կապված բողոքներ քննող անձին է ներկայացվել բողոք, որը ընդունվել է վարույթ և նույն օրը ժամը՝ 18:10-ին հրապարակվել www.gnumner.am կայքում:

ix. Հանձնաժողովի 17.03.2021թ.-ի թիվ 7 արձանագրության համաձայն՝ գնահատող հանձնաժողովի նախագահ Ս. Մանգասարյանը տեղեկացրել է, որ «Իմփորթ Էջնսի» ՍՊԸ-ի բողոքի ներկայացման հիման վրա ՀՀ գնումների հետ կապված բողոքներ քննող անձի հայտարարության և «Գնումների մասին» ՀՀ օրենքի 51-րդ հոդվածի 1-ին մասի համաձայն գնումների հետ կապված բողոքներ քննող անձին ներկայացված բողոքն ինքնաբերաբար կասեցրել է գնման գործընթացը՝ «Գնումների մասին» ՀՀ օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքարկման վերաբերյալ ընդունված որոշման՝ տեղեկագրում հրապարակման օրը ներառյալ:

x. Նույն արձանագրության համաձայն՝ Հանձնաժողովը որոշել է հաջորդ նիստը հրավիրել բողոքարկման վերաբերյալ ընդունված որոշման՝ տեղեկագրում հրապարակման հաջորդող աշխատանքային օրը, ՀՀ պետական եկամուտների կոմիտեի վարչական շենքում, ք. Երևան, Մ. Խորենացու-3, 7 հասցեում:

xi. Գնումների հետ կապված բողոքներ քննող անձի 26.03.2021թ.-ի թիվ ԳԲՔԱ-ՆԳ-2021/15 ծածկագրով որոշմամբ (այսուհետ նաև՝ Որոշում) «Իմփորթ Էջնսի» ՍՊԸ-ի կողմից 16.03.2021թ.-ին ներկայացված բողոքը մերժվել է:

xii. Որոշումը հրապարակվել է www.gnumner.am կայքում 30.03.2021թ.-ին:

xiii. Հանձնաժողովի 31.03.2021թ.-ի թիվ 8 արձանագրության համաձայն՝ գնահատող հանձնաժողովը, հիմք ընդունելով թիվ ԳԲՔԱ-ՆԳ-2021/15 ծածկագրով բողոքի վերաբերյալ ՀՀ գնումների հետ կապված բողոքներ քննող անձի կայացրած որոշումը, վերսկսել է «ՊԵԿ-ԲՄԱՇՁԲ-21/1» ծածկագրով գնման ընթացակարգի հետագա ընթացքը: Գնահատող հանձնաժողովի նախագահ Ա. Մանգասարյանը հայտնել է, որ հանձնաժողովը 15.03.2021թ. թիվ 6 որոշմամբ՝ «ՊԵԿ-ԲՄԱՇՁԲ-21/1» ծածկագրով գնման ընթացակարգի հրավերի 8.9 կետի հիմքով, մեկ աշխատանքային օրով կասեցրել էր նիստը և էլեկտրոնային եղանակով տեղեկացրել «ANY Biztonsagi Nyomda» Nyrt-ին և «Իմփորթ Էյջնսի» ՍՊԸ-ին առաջարկելով՝ մինչև կասեցման ժամկետի ավարտը շտկել անհամապատասխանությունները, սակայն «Իմփորթ Էյջնսի» ՍՊԸ-ի 16.03.2021թ.-ի բողոքի հիման վրա «ՊԵԿ-ԲՄԱՇՁԲ-21/1» ծածկագրով գնման ընթացակարգը կասեցվել է:

xiv. Նույն արձանագրության համաձայն՝ Հանձնաժողովը, հաշվի առնելով, որ անհամապատասխանությունների շտկման փուլում ՀՀ գնումների հետ կապված բողոքներ քննող անձը կայացրել է որոշում գնման ընթացակարգը կասեցնելու վերաբերյալ, որը հրապարակվել է գնումների պաշտոնական տեղեկագրում 16.03.2021թ. ժամը 18:10-ին, գնահատող հանձնաժողովը գնման ընթացակարգի հետագա ընթացքի վերաբերյալ որոշել է պարզաբանման նպատակով դիմել ՀՀ ֆինանսների նախարարությանը, և խնդրել հայտնել, թե արդյոք նորից հնարավորություն պետք է տրվի «ANY Biztonsagi Nyomda» Nyrt-ին և «Իմփորթ Էյջնսի» ՍՊԸ-ին շտկելու հայտերում տեղ գտած անհամապատասխանությունները:

xv. Հանձնաժողովի 05.04.2021թ.-ի թիվ 9 արձանագրության համաձայն՝ գնահատող հանձնաժողովի նախագահ Ա. Մանգասարյանը տեղեկացրել է, որ գնահատող հանձնաժողովը գնման ընթացակարգի հետագա ընթացքի վերաբերյալ պարզաբանման նպատակով դիմել էր ՀՀ ֆինանսների նախարարությանը, պարզելու համար, թե արդյոք նորից հնարավորություն պետք է տրվի «ANY Biztonsagi Nyomda» Nyrt-ին և «Իմփորթ Էյջնսի» ՍՊԸ-ին՝ շտկելու հայտերում տեղ գտած անհամապատասխանությունները: ՀՀ ֆինանսների նախարարության կողմից 02.04.2021թ. ստացվել պատասխան թիվ-01.1/26-1/4879-2021 գրությունը, որով ՀՀ ֆինանսների նախարարությունը հայտնել է, որ գնումների մասին ՀՀ օրենսդրության համաձայն հայտերի գանահատման լիազորությունը վերապահված է գնահատող հանձնաժողովին:

xvi. Նույն արձանագրության համաձայն՝ գնահատող հանձնաժողովը քննարկման արդյունքում որոշել է հնարավորություն տալ «ANY Biztonsagi Nyomda» Nyrt-ին և «Իմփորթ Էյջնսի» ՍՊԸ-ին՝ շտկելու հայտերում տեղ գտած անհամապատասխանությունները:

xvii. «ՊԵԿ-ԲՄԱՇՁԲ-21/1» ծածկագրով գնահատող հանձնաժողովը որոշել է նիստը մեկ աշխատանքային օրով կասեցնել և էլեկտրոնային եղանակով տեղեկացնել «ANY Biztonsagi Nyomda» Nyrt-ին և «Իմփորթ Էյջնսի» ՍՊԸ-ին առաջարկելով մինչև կասեցման ժամկետի ավարտը շտկել անհամապատասխանությունները:

xviii. Հանձնաժողովի քարտուղարի կողմից 05.04.2021թ.-ին armeps.am համակարգի միջոցով «ANY Biztonsagi Nyomda» Nyrt-ին և «Իմփորթ Էյջնսի» ՍՊԸ-ին ուղարկվել է ծանուցում, որում մասնավորապես նշվել է, որ ծանուցումը ստանալուց մեկ աշխատանքային օրվա ընթացքում պետք է շտկել անհամապատասխանությունը և ծանուցմամբ նշված փաստաթուղթը ուղարկել գնումների համակարգողի էլ. փոստին՝ gurgen_ghazaryan@taxservice.am հասցեով և դրա բնօրինակը ներկայացնել գնահատող հանձնաժողովին: Միաժամանակ հիշեցրել է, որ համաձայն «ՊԵԿ-ԲՄԱՇՁԲ-21/1» ծածկագրով գնման հրավերի 8.10 կետի՝ եթե մասնակիցը շտկում է արձանագրված անհամապատասխանությունը, ապա վերջինիս հայտը գնահատվում է բավարար: Հակառակ դեպքում հայտը գնահատվում է անբավարար և մերժվում է:

xix. «Իմփորթ Էյջնսի» ՍՊԸ-ի կողմից հայտի ապահովում Հանձնաժողովին ընդհանրապես չի ներկայացվել:

xx. «Էյ Էմ Փի Ջի գրուպ» ՍՊԸ-ի կողմից 05.04.2021թ.-ին գնումների հետ կապված բողոքներ քննող անձին ներկայացված թիվ ԳԲՔԱ-ԼՕ-2021/27 ծածկագրով բողոքը 05.05.2021թ.-ին կայացված որոշմամբ բավարարվել է և Հանձնաժողովին պարտավորեցվել է ընդունել «Իմփորթ Էյջնսի» ՍՊԸ-ի և «Իմփորթ Էյջնսի» ՍՊԸ-ի հայտը մերժելու մասին որոշում:

xxi. Հանձնաժողովի 10.05.2021թ.-ի նիստի թիվ 11 արձանագրության համաձայն՝ Հանձնաժողովը, հիմք ընդունելով ՀՀ գնումների հետ կապված բողոքներ քննող անձի թիվ ԳԲՔԱ-ԼՕ-2021/27 ծածկագրով որոշումը, որոշել է «Իմփորթ Էյջնսի» ՍՊԸ-ի և «Իմփորթ Էյջնսի» ՍՊԸ-ի հայտերը գնահատել անբավարար և մերժել, քանի որ վերջիններս սահմանված ժամկետում չեն շտկել հայտերում արձանագրված անհամապատասխանությունները:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ ՀՀ ֆինանսների նախարարության կողմից 18.05.2021 թ.-ի թիվ 26/26-1/7824-2021 գրությամբ «Իմփորթ Էյջնսի» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է բավարարման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) Օրենքի 30-րդ հոդվածի 1-ին մասի համաձայն՝ մասնակիցը հայտը ներկայացնում է հրավերով սահմանված կարգով: Հայտը ներառում է մասնակցի հաստատած՝

1) հրավերի պահանջներին իր տվյալների համապատասխանության մասին հայտարարությունը.

2) գնային առաջարկը.

3) ոչ գնային առաջարկը (տեխնիկական առաջարկ կամ տեխնիկական բնութագիր), եթե հրավերով նախատեսված է.

4) հրավերով նախատեսված այլ փաստաթղթեր (տեղեկություններ):

Օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

ՀՀ կառավարության 04.05.2017թ.-ի թիվ 526-Ն որոշմամբ (30.07.2020թ.-ի թիվ 1275-Ն փոփոխություններով) հաստատված «Գնումների գործընթացի կազմակերպման» կարգի (այսուհետ նաև՝ Կարգ) 40-րդ կետի 4-րդ ենթակետի համաձայն՝ հայտերի բացման և գնահատման նիստում հանձնաժողովը մերժում է այն հայտերը, որոնցում բացակայում է գնային առաջարկը, կամ եթե այն ներկայացված է հրավերի պահանջներին անհամապատասխան, բացառությամբ սույն կարգի 41-րդ կետով նախատեսված դեպքի: Գնումն էլեկտրոնային համակարգով իրականացվելու դեպքում հիմք է ընդունվում համակարգում կցված՝ մասնակցի կողմից հաստատված գնային առաջարկը:

Կարգի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ ներառյալ այն

դեպքերը, երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը: Եթե անհամապատասխանությունն արձանագրվել է ՀՀ պետական եկամուտների կոմիտեից ստացված տեղեկատվության հիման վրա, ապա մասնակցին ուղարկվող ծանուցմանը կցվում է նաև կոմիտեից ստացված տեղեկատվության բնօրինակից սկանավորված տարբերակը: Մասնակցին ուղարկվող ծանուցման մեջ մանրամասն նկարագրվում են հայտնաբերված անհամապատասխանությունները:

Կարգի 42-րդ կետի համաձայն՝ եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, ներառյալ եթե մասնակիցը սույն կարգի 32-րդ կետի 1-ին մասի «ե» պարբերությամբ սահմանված ժամկետում չի ներկայացնում հայտի ապահովման բնօրինակը, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

«ՊԵԿ-ԲՄԱՇՁԲ-21/1» ծածկագրով բաց մրցույթի հրավերի (այսուհետ նաև՝ Հրավեր) 8.9-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, ներառյալ երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին համակարգի միջոցով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Նույն հրավերի 8.10-րդ կետի համաձայն՝ եթե սույն հրավերի 8.9-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա վերջինիս հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, ներառյալ եթե մասնակիցը

սույն հրավերով սահմանված ժամկետում չի ներկայացնում հայտի ապահովման բնօրինակը, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

Վերոգրյալ իրավակարգավորումների լույսի ներքո, Բողոքներ քննող անձը փաստում է, որ մասնակիցը ներկայացնում է հրավերով սահմանված կարգով հայտ, որը ներառում է մասնակցի կողմից ներկայացված դիմում-հայտարարությունը, գնային առաջարկը, հրավերով նախատեսված այլ փաստաթղթեր (տեղեկություններ): Ընդ որում, Կարգի 41-րդ կետը ուղղակիորեն սահմանում է արձանագրված անհամապատասխանությունը շտկելու անթույլատրելիություն հայտում ներառվող միայն գնային առաջարկի համար, այն էլ՝ որոշ բացառություններով: Սույն կետի իմաստից բխում է, որ մնացած բոլոր դեպքերում հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Հայտերի գնահատումն իրականացվում է հրավերով սահմանված կարգով և հրավերով նախատեսված պայմաններին չհամապատասխանող հայտերը գնահատվում են անբավարար և մերժվում են, ներառյալ եթե մասնակիցը մինչև հայտերի ներկայացման վերջնաժամկետը լրանալուն հաջորդող աշխատանքային օրվա Երևանի ժամանակով 17:00-ն գնահատող հանձնաժողովին չի ներկայացնում հայտի ապահովման բնօրինակը:

Բողոքներ քննող անձը հարկ է համարում նշել, որ գործադիրն իմպերատիվ կերպով սահմանել է, որ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, բացառությամբ այն դեպքերի երբ բացակայում է գնային առաջարկը կամ եթե վերջինս ներկայացված է հրավերի պահանջներին անհամապատասխան, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Սույն գործի փաստերի համաձայն՝ ՀՀ պետական եկամուտների կոմիտեի կողմից ակցիզային դրոշմանիշերի և դրոշմապիտակների տպագրության աշխատանքների ձեռքբերման նպատակով 25.01.2021թ.-ին հայտարարված «ՊԵԿ-ԲՄԱՇՁԲ-21/1» ծածկագրով բաց մրցույթին մասնակցելու նպատակով հայտ ներկայացրած «Իմփորթ Էջնսի» ՍՊԸ-ին հայտի ապահովում Հանձնաժողովին չի ներկայացրել: Նշվածով

պայմանավորված՝ Հանձնաժողովը, հիմք ընդունելով ՀՀ կառավարության թիվ 526-Ն որոշմամբ հաստատված գնումների գործընթացի կազմակերպման կարգի 41-րդ կետը, որոշել է մեկ աշխատանքային օրով կասեցնել նիստը և էլեկտրոնային եղանակով տեղեկացնել «Իմփորթ Էյջնսի» ՍՊԸ-ին՝ առաջարկելով մինչև կասեցման ժամկետի ավարտը շտկել անհամապատասխանությունները: Հանձնաժողովի քարտուղարի կողմից 15.03.2021թ.-ին armeps.am համակարգի միջոցով «Իմփորթ Էյջնսի» ՍՊԸ-ին ուղարկվել է ծանուցում, որում մասնավորապես նշվել է, որ ծանուցումը ստանալուց մեկ աշխատանքային օրվա ընթացքում պետք է շտկել անհամապատասխանությունը և ծանուցմամբ նշված փաստաթուղթը ուղարկել գնումների համակարգողի էլ. փոստին՝ gurgen_ghazaryan@taxservice.am հասցեով և դրա բնօրինակը ներկայացնել գնահատող հանձնաժողովին: Միաժամանակ հիշեցրել է, որ համաձայն «ՊԵԿ-ԲՄԱՇՁԲ-21/1» ծածկագրով գնման հրավերի 8.10 կետի՝ եթե մասնակիցը շտկում է արձանագրված անհամապատասխանությունը, ապա վերջինիս հայտը գնահատվում է բավարար: Հակառակ դեպքում հայտը գնահատվում է անբավարար և մերժվում է: «Իմփորթ Էյջնսի» ՍՊԸ-ն հայտի ապահովում Հանձնաժողովին ընդհանրապես չի ներկայացրել: Հանձնաժողովը, հիմք ընդունելով ՀՀ գնումների հետ կապված բողոքներ քննող անձի թիվ ԳԲԲԱ-ԼՕ-2021/27 ծածկագրով որոշումը, որոշել է «Իմփորթ Էյջնսի» ՍՊԸ-ի հայտը գնահատել անբավարար և մերժել, քանի որ վերջինս սահմանված ժամկետում չի շտկել հայտում արձանագրված անհամապատասխանությունները:

Օրենքի 6-րդ հոդվածի 1-ին մասի 6-րդ կետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նույն հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում: Տվյալ մասնակցի կարծիքը լսելուց հետո գնումների հետ կապված բողոքներ քննող անձը նույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Կարգի 32-րդ կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 45-րդ կետի համաձայն՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Նշված իրավանորմերի վերլուծությունից պետք է փաստել, որ օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվելը: Միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Բողոքներ քննող անձը փաստում է նաև, որ մասնակիցը պարտավոր է ներկայացնել հրավերով սահմանված պահանջներին համապատասխանող փաստաթղթեր (այսուհետ՝ Փաստաթղթեր): Եվ եթե Փաստաթղթերում արձանագրվում են անհամապատասխանություններ՝ հրավերի պահանջների նկատմամբ, իսկ մասնակիցը սահմանված ժամկետում չի շտկում արձանագրված անհամապատասխանությունները, ապա այդ հանգամանքը համարվում է որպես գնման գործընթացի շրջանակում ստանձնած պարտավորության խախտում: Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցնում է պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը:

Սույն գործի փաստերի համաձայն՝ «Իմփորթ Էյջնսի» ՍՊԸ-ն մասնակցության հայտի թիվ 1 հավելվածով՝ գնանշման հարցման ընթացակարգին մասնակցելու դիմում-հայտարարությամբ, հայտարարել և հավաստել է, որ բավարարում է «ՊԵԿ-ԲՄԱՇՁԲ-21/1» ծածկագրով գնման ընթացակարգի հրավերով սահմանված մասնակցության իրավունքի պահանջներին և հրավերի պահանջներին համապատասխան ներկայացնում է հայտ:

Վերոնշյալներով պայմանավորված՝ առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցրել է Պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը, որպիսի պայմաններում Մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում՝ Բողոքներ քննող անձը հանգում է այն եզրակացության, որ «Իմփորթ Էյջնսի» ՍՊԸ-ն Պատվիրատուի կողմից սահմանված ժամանակահատվածում, չշտկելով արձանագրված անհամապատասխանությունները, խախտել է գնման գործընթացի շրջանակում ստանձնած պարտավորությունը, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը՝

Ո Ր Ո Շ Ե Ց

1. ՀՀ ֆինանսների նախարարության կողմից 18.05.2021 թ.-ի թիվ 26/26-1/7824-2021 գրությամբ «Իմփորթ Էյջնսի» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ՍՑ-ԼՕ-2021/131 ծածկագրով ընթացակարգը բավարարել:

2. «Իմփորթ Էյջնսի» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆԶ՝**



ԼԵՎՈՆ ՕՇԱՆՅԱՆ